

## "Službeni glasnik BiH" broj: 95/10

Na osnovu člana 30. stav (1) tačka e) i stava (2) Zakona o platama i naknadama u institucijama Bosne i Hercegovine ("Službeni glasnik BiH", br. 50/08, 35/09 i 75/09), člana 50. stav 1. i člana 104. stav 2. Zakona o radu u institucijama Bosne i Hercegovine ("Službeni glasnik BiH", br. 26/04, 7/05, 48/05 i 60/10) i člana 17. Zakona o Vijeću ministara Bosne i Hercegovine ("Službeni glasnik BiH", br. 30/03, 42/03, 81/06, 76/07, 81/07, 94/07 i 24/08), Vijeće ministara Bosne i Hercegovine na 136. sjednici, održanoj 2. novembra 2010. godine, donijelo je

### **ODLUKU**

#### **O NAČINU I POSTUPKU OSTVARIVANJA PRAVA NA NAKNADU ZA PORODILJSKO ODSUSTVO U INSTITUCIJAMA BOSNE I HERCEGOVINE**

##### Član 1.

(Predmet Odluke)

Ovom Odlukom uređuje se način i postupak ostvarivanja prava zaposlenih u institucijama Bosne i Hercegovine na naknadu za porodiljsko odsustvo, u skladu sa članom 104. stav 2. Zakona o radu u institucijama Bosne i Hercegovine.

##### Član 2.

(Visina naknade)

(1) Zaposleni u instituciji Bosne i Hercegovine na porodiljskom odsustvu ima pravo na mjesečnu naknadu u visini prosječne neto plate koju je ostvario u toku posljednja tri mjeseca prije otpočinjanja porodiljskog odsustva.

(2) Ukoliko je zaposleni u radno-pravnom statusu u instituciji Bosne i Hercegovine manje od tri mjeseca prije otpočinjanja porodiljskog odsustva ima pravo na mjesečnu naknadu u visini prosječne neto plate utvrđene na bazi broja mjeseci radno-pravnog statusa u instituciji Bosne i Hercegovine prije otpočinjanja porodiljskog odsustva.

(3) Pod neto platom, u smislu st. (1) i (2) ovog člana, podrazumijeva se osnovna plata uvećana za dodatak po osnovu minulog rada.

##### Član 3.

(Način dokazivanja porodiljskog odsustva)

(1) Da bi zaposleni ostvario pravo na naknadu za vrijeme porodiljskog odsustva, potrebno je da dostavi Izvještaj o trajanju privremene spriječenosti za rad izdat od

strane nadležne zdravstvene ustanove, a kojim se dokazuje da se isti nalazi na porodiljskom odsustvu.

(2) Zaposleni je dužan dostaviti Izvještaj iz stava (1) ovog člana, nadležnoj službi budžetskog korisnika, najkasnije do početka obračuna plate za mjesec u kojem je zaposleni bio na porodiljskom odsustvu.

##### Član 4.

(Obračun i isplata naknade)

(1) Obračun i isplata naknade za porodiljsko odsustvo zaposlenom u instituciji Bosne i Hercegovine, te uplata poreza i doprinosa po tom osnovu vrši se uz mjesečni obračun i isplatu plata i naknada zaposlenih u institucijama Bosne i Hercegovine na osnovu Izvještaja, iz člana 3. stav (1) ove Odluke i rješenja o porodiljskom odsustvu izdatog od strane rukovodioca institucije.

(2) Naknada po osnovu porodiljskog odsustva, te pripadajući porezi i doprinosi isplaćuju se na teret Budžeta institucija Bosne i Hercegovine i međunarodnih obaveza Bosne i Hercegovine.

##### Član 5.

(Refundacija naknade)

(1) Institucija Bosne i Hercegovine, u skladu sa članom 104. stav 2. Zakona o radu u institucijama Bosne i Hercegovine, ne vrši refundaciju naknade na osnovu porodiljskog odsustva od nadležnih fondova socijalne zaštite.

(2) Zaposlenom u instituciji Bosne i Hercegovine koji je ostvario pravo na naknadu u skladu sa odredbama ove Odluke ne pripada pravo na refundaciju naknade na osnovu porodiljskog odsustva od nadležnih fondova socijalne zaštite.

(3) Rješenje o porodijskom odsustvu iz člana 4. stav (1) ove Odluke institucije Bosne i Hercegovine dužne su dostaviti nadležnim fondovima socijalne zaštite.

Član 6.

(Institucije odgovorne za provođenje Odluke)

(1) Za realizaciju ove Odluke zadužuju se institucije Bosne i Hercegovine i Ministarstvo finansija i trezora.

(2) Ministarstvo finansija i trezora dužno je pratiti zakonsku regulativu entiteta, kantona i Brčko Distrikta Bosne i Hercegovine iz ove oblasti.

(3) U slučaju promjene zakonske regulative iz stava (2) ovog člana u pogledu visine naknade po osnovu porodijskog odsustva, Ministarstvo finansija i trezora je dužno dostaviti Vijeću ministara Bosne i Hercegovine

izmjenu i dopunu ove Odluke najkasnije u roku od 30 dana od dana navedene izmjene, polazeći od odredbi člana 104. stav 2. Zakona o radu u institucijama Bosne i Hercegovine.

Član 7.

(Stupanje na snagu)

Odluka stupa na snagu danom donošenja i objavljuje se u "Službenom glasniku BiH", a primjenjivat će se od 29.09.2010. godine.

---

VM broj 274/10  
2. novembra 2010. godine  
Sarajevo

---

Predsjedavajući  
Vijeća ministara BiH  
Dr. **Nikola Špirić**, s. r.